

# Powšitkowne WOZJEWJENJA

njedźelu, 28. nowembra 2021

## Wusyłanje Božej mše

Serbskorěčnu Božu mšu móža wěriwi tutu njedźelu, 28. nowembra, jako livestream w interneće sčehować. Wona přenese so w 9 hodź. z Chróšćanskeje cyrkwy. Link na nju je pod [www.posol.de](http://www.posol.de) a na wosadnej stronje podaty.

## Hłowna zhromadźizna TCM njebudže

Aktualnych škitnych postajenjow dla dyrbi so dotal za srjedu, 1. decembra, planowana hłowna zhromadźizna Towarstwa Cyrila a Metoda z.t. (TCM) přestorčić. Nowy termin za klětu so sčasom wozjewi.

## Adwentnička dekanatneje młodžiny

Lětuša adwentnička dekanatneje młodžiny budže njedźelu, 5. decembra, w Kulowje. Nyšpor w 14.00 hodź. wobruhi spěwna skupina 1. serbskeje kulturneje brigady. Wo-pyt nyšpora je jeničce po reguli 3G móžny.

## Změna wotewrjenskich časow

Klášterski wobchod w Pančicach-Kukowje rozšěri na wšitkich adwentnych sobotach swoje wotewrjenske časy. Zajimcy móža w nim wot 10 do 16 hodź. nakupować. Přístup pak maja po reguli 2G jeničce šćěpjeni a wustrowjeni.

## Zetkanje samostejacych so njewotměje

Planowane zetkanje samostejacych ze serbskich wosadow, kotraž mělo so wutoru, 7. decembra wotměć, aktualnych škitnych postajenjow dla njebudže. Nowe terminy za klětu so sčasom wozjewja.

## Dalekubłanje lektorow

Na dalekubłanje za lektorow na Božich službach přeprašuje biskopski ordinariat Drježdžansko-Mišnjanskeho biskopstwa. Wot referentki dr. Lioby Faust dóstanu wobdźělnicy pokiwy, kak zamóža woni teksty adwentneho a hodowneho časa tak přednjesć, zo je jeničce njepředčitaja, ale zdobom wozjewjeja. Onlinowy kurs wobsteji z dweju dźělow, kiž na so nawjazujetej, a wotměje so pónđzelu, 6. decembra, a wutoru, 14. decembra, stajnje wot 18.30 do 20.30 hodź. přez platformu Zoom. Link k přizjewjenju a z dalšimi informacijemi je pod [www.posol.de](http://www.posol.de) podaty. Wobdźělenje na dalekubłanju je bjezplatne. Ličba wobdźělnikow je wobmjezowana.

## Adwentny kalender biskopstwa

Na internetowej stronje Drježdžansko-Mišnjanskeho biskopstwa [www.bistum-dresden-meissen.de](http://www.bistum-dresden-meissen.de) poskićuja lětsa wospjet adwentny kalender. Tutón budže wot přenjeho adwenta, njedźelu, 28. nowembra, hač do hód, sobotu, 25. decembra, přistupny a wopřija wšědnje wobraz z krótkim impulsom k rozmyslowanju.